



KEMENTERIAN PERTANIAN DAN KETERJAMINAN MAKANAN

Ministry of Agriculture and Food Security

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan
62624 PUTRAJAYA,
MALAYSIA

No. Telefon : 03-8000 8000

No. Faks : 03-8888 6020

Laman Web : www.mafi.gov.my

SIARAN MEDIA

KEMAMPANAN SEKTOR AGROMAKANAN NEGARA TERAS MENGEMUDI CABARAN KRISIS GLOBAL

PUTRAJAYA, 16 JANUARI 2023 – Menteri Pertanian dan Keterjaminan Makanan (MAFS) Tuan Haji Mohamad Sabu hadir dan merasmikan Majlis Amanat Menteri MAFS dengan tema “Kemampuan Sektor Agromakanan Negara Teras Mengemudi Cabaran Krisis Global”, di Wisma Tani, hari ini.

Menurut Mohamad, tema yang diangkat merupakan manifestasi kepada peranan Kementerian sebagai penjamin bekalan makanan negara supaya sentiasa mencukupi dan tersedia buat semua rakyat Malaysia. Kerajaan melalui MAFS juga sentiasa prihatin dengan isu bekalan makanan serta melaksanakan pelbagai langkah intervensi dalam membantu mengawal harga dengan menstabilkan bekalan.

Pada tahun 2023 keadaan ekonomi dunia dijangka akan menjadi lebih mencabar di mana krisis tenaga dan keterjaminan makanan menjadi antara ancaman utama ekonomi khususnya bagi negara membangun. Prospek sektor agromakanan negara diramal akan berhadapan cabaran khususnya dalam mengekalkan pertumbuhan perdagangan berikutan peningkatan ketidaktentuan geopolitik serta penyusutan eksport negara.

Menerusi ucaptamanya, Mohamad menyatakan bahawa keterjaminan makanan merupakan antara perkara yang menjadi keutamaan Kerajaan Perpaduan dan penukaran nama baharu Kementerian yang dahulunya dikenali sebagai Kementerian Pertanian dan Industri Makanan (MAFI), kini dijenamakan semula sebagai Kementerian Pertanian dan Keterjaminan Makanan atau Ministry of Agriculture and Food Security (MAFS), merupakan langkah pertama menyokong kepada aspirasi ini seiring dengan objektif Pelan Tindakan Dasar Sekuriti Makanan Negara 2021-2025 dan Dasar Agromakanan Negara 2021-2030 (DAN 2.0).

Bagi menjayakan agenda keterjaminan makanan negara, Kementerian menggariskan lima hala tuju dan fokus utama pada tahun 2023 iaitu yang pertama memperkasakan industri akuakultur dengan menyasarkan peningkatan hasil ikan daripada aktiviti akuakultur kepada 60 peratus, kedua memperluas penternakan lembu secara *fidlot* bagi memenuhi keperluan bekalan daging tempatan dan eksport supaya sasaran pengeluaran daging tempatan akan dapat ditingkatkan untuk mencapai sasaran 50 peratus daging (SSR) menjelang tahun 2025, ketiga memulakan usaha penanaman jagung bijian (*grain corn*) bagi mengurangkan 30 peratus daripada pergantungan import.

Selain itu satu perancangan dan tindakan yang tersusun perlu dilakukan segera bagi mencukupkan bekalan makanan dalam negara dan memastikan rakyat mempunyai akses kepada semua jenis nutrien yang diperlukan. Kementerian juga akan memberi fokus kepada meningkatkan penglibatan belia dalam sektor agromakanan dan pertanian pintar selaras dengan Revolusi Perindustrian Keempat (IR4.0) dan yang kelima memperkasakan institut latihan pertanian dalam misi melahirkan graduan yang berkualiti tinggi dalam bidang teknologi pertanian, penyelidikan dan pembangunan (R&D) dan pertanian moden selaras dengan hasrat negara dalam membentuk pekerja mahir pertanian.

Melalui citra dan hasrat yang digariskan, Mohamad berharap ianya dapat disokong dengan perubahan sikap dan mentaliti yang ditonjolkan oleh warga Kementerian dan golongan sasar. Warga Kementerian juga diseru untuk meneruskan amalan budaya berintegriti tinggi, amanah dan cekap yang merupakan etika kerja sangat penting kepada pencapaian hasil kerja berkualiti tinggi.

Hadir sama dimajlis ini Timbalan Menteri Pertanian dan Keterjaminan Makanan, YB Chan Foong Hin, Ketua Setiausaha MAFS, Dato' Haslina Abdul Hamid dan pegawai-pegawai kanan Kementerian.

KEMENTERIAN PERTANIAN DAN KETERJAMINAN MAKANAN
16 JANUARI 2023